

Naul nga Pol Muli Womue tevi
 TIMOTI
 Batu nale nga mivsivseni lut nga
 parmeteni naul ngel puto suri

Timoti tasu sen evi nesen Isrel san nga mivi kele kalesia, ko tata sen evi ñeri Gris. Ko etipatun majingen sen nga ñimajing tevi Pol daron nga mivi ñelakel malume. Pol oli naul ngel nga rramveruse 1 Timoti tevi Timoti daron nga ni mokmetmete kalesia nir ie Epesas. Pol owra Timoti puwer ore nevisvisenien gerisen nga jinibb sopor marok-visviseni ie. Ko osþe kele suri lat nga marlot muto suri, ko lat nga kalesia liken ser puto suri renge devjen sopor kele.

Pol owra erres tevi Timoti

¹ Inu Pol, nuvi aposol se Iesu Kristo suri nale se Atua nga ñilai mauren tevi kerr, ko Iesu Kristo Numal se kerr nga rramok-teravi. ² Nuwrai 'erres' tevi nik Timoti. Kurpe natuk woswos renge kalesia nir. Ko ngel evi loten suk, nga merrenien, netlasien, ko demat se Atua Tata ko Numal se kerr Iesu Kristo piptevim.

Pol owra puwer ore nevisvisenien gerisen

³ Erpe mowrai pa musuw tevim daron nga ñelin-glingim nga bean Masetonia, numrreni nik kuplik ko wor Epesas, nga kupwer ore nir nga marok-visviseni gerisen nir. ⁴ Ko kupwera tevi nir nga nir parlinglingi tutunmasa gerisen ser ko naul nga marpepriv lenglengen ne nise metka ser nir. Daron nga marmeteni nanu ngok nir, ko arpalpal elep. Ko marongen se Atua sete orongwos piplari renge nanu ngok nir. Eplari kobbong renge

nosurien se jinibb nir. ⁵ Ko Atua owrai kerr rrap̄elak tweni merrenien nga miplari renge nalol nga muwokwok m̄irres, ko nga sete mubbujbbuj suri nanu nga marsij nga rramlolir, ko renge nosurien nga mivi weretunen. ⁶ Jinibb sopor arlinglingi pa murrun ngok nir ko arsarr pa renge nale nawon. ⁷ Nir arwera arongrongwos elep suri nale neseseien se Atua, ko arok-rij eterter erpe norongwosien ser mutoe kobbong. Ko setete arongwose suri murru nale nga marok-werai.

⁸ Ko rramrongwose erres nga nale neseseien se Atua erres poro parrul totkoni renge sel momsawos nen. ⁹ Ko tetajer rraprongwose nga nale neseseien sete eplari tweni jinibb nga marres kobbong, ko purrul totkoni ma jinibb nga marok-tor otvi nale, ko jinibb nga marok-loli batur, ko jinibb nga sete marosuri Atua, ko jinibb nga marok-loli nololien nir, ko jinibb nga sete marvijuri sel se Atua ko sete marok-rrormi Atua nabong sapon, ko jinibb nga marok-revji pini tata ser ko tasu ser, rreknga marok-revji pini jinibb lele. ¹⁰ Ko evi nga purrul totkoni norman nga sete puloli p̄isij tevi nesevin, ko nesevin nga sete puloli p̄isij tevi norman, ko norman nga sete puloli p̄isij tevi norman pirpok kele. Ko evi kele nga purrul totkoni nir nga marok-venae jinibb, ko nir nga markerkeris, ko nir nga marlai nale gerisen re nos̄pen se numal nir, ko nir nga marloli murrun m̄inij kele nga marsij ko martor otvi nale nga musorsan.

Kristo etlasi Pol ko elngi nos̄pen nga m̄irres renge nevren

¹¹ Nale ngok nga musorsan eplari renge nos̄pen nga m̄irres ne nosrövien se Atua. Rrapsurövi ni rengen. Ko nos̄pen ngok Atua elngi pa renge nevrek osuw nga inu bowra tweni. ¹² Inu nuwra erres tevi Iesu Kristo, Numal se kerr, nga m̄ilai derteren tevi inu, ko m̄ilesi inu mosorsan nga botori majingen sen. ¹³ Tuwi, nomok-rij esij tere ni,

nomok-oji jinibb sen nir, ko nomok-loli esij tevir. Ko iok erpe nuloli esij tevi ni mawos. Ko erres kobbong, ni ornge esij suri inu, suri inu sete nurongwose nanu nga nomok-loli nir, ko sete nuosuri re wosenen. ¹⁴ Ko merrenien se Numal se kerr emejivjiv nawon ko elai nosurien ko merrenien nga morivi se kerr kokorti vajin tevi Iesu Kristo. ¹⁵ Ko nale ngel nga muwrai Iesu Kristo mivini iel ngatan nga ðila mauren tevi jinibb nga marsij evi nale weretunen, nga kerr rraposuri ko wor tetajer.

Ko inu nusij wor asi nir ngok. ¹⁶ Ko Iesu Kristo etlasi inu suri emrreni piviseni rrongi renge inu nolon nga mipriv torrlai tevi jinibb nir nga nir kele para-osuri ni, nga parator sweri mauren nga puto tuwi ngok vini. ¹⁷ Atua evi Numal ne tuwi ngok vini nga mauren sen sete orongwos pusuw nabong san. Evi Atua nga sete rramrongwos rraplesi; esan kobbong evi Atua. Rrapsusture ko wor nisen pian mare, ko rrapsturövi lelingenok ko pian pijpari tuwi ngok vini. Amen.

¹⁸ Ñelai nale ngel tevim, natuk Timoti, nga pusorsan tevi nale se Atua nga marwerai pae womu piplari suri nik. Kuptori totkoni nale ser nir, puloli norrorrmien som puto ðiterter nga kupbböt totkoni nanu nga marsij nir. ¹⁹ Kupmetmete nosurien som ðirres, ko kupmetmet kele nga norrorrmien som sete pubbujbbuj, ko kupiel lingi sel nga ñisij pivesane. Jinibb sopor sete arloli erpok, ko arlokloksi pa nosurien ser osuw. ²⁰ Renge laru ngok nuru Aemenaes ko Aleksanda, nuru orloli pa esij erpok, ko nulngi pa nuru re derteren se Demij nga porlinglingi murrun ne nale nga ñisij.

¹ Nale suk nga womujnen nga kupweraĩ pĩterter tevi nir, ngel: nga nir parlot ko wor pilep tevi Atua suri jinibb nir. ² Ko parlot renge loten lele nir suri numal nir ko jinibb nga marlelep nga martori totkoni vanu nir, nga Atua purongwos pĩlik tevir renge majingen ser; ko nga rraprongwos rraplik renge liken nga mumolmol mĩrres, ko nga rraprongwos rraplot tevi Atua ko nga rraprongwos rrapvijuri murrun jijle nga mĩrres. ³ Murrun ne loten nga mirpok erres p̄elak, ko ololi Atua nga mĩla mauren tevi kerr ornge erres. ⁴ Suri ni emrreni p̄ila mauren tevi jinibb totoklai, ko nga parlesi wose sev nga mivi weretunen. ⁵ Atua esan rres kobbong. Ko jinibb san esan rres kele nga mĩlik livö e Atua ko jinibb nir, evi Iesu Kristo nga mivi jinibb. ⁶ Ko ni elngi mauren sen nga puloli lilane sel nga pujri lweni jinibb jijle nir rengen. Iok eviseni erres renge daron momsawos nen nga Atua mimrreni p̄ila mauren tevi jinibb totoklai. ⁷ Ko Atua okoni inu erpe aposol nga bowra tweni nanu ngok. Nuwretun, sete nukerkeris; majingen suk evi nga bevisviseni jinibb ne vare nir murrun ne nosurien nga mivi weretunen. ⁸ Renge lat jijle, numrreni jinibb nir parlik malum nga lolaren ko laten pijki jir, ko nga parsusi nevrer paran mare ko parlot loten nga mumomsawos vajin tevi Atua.

Murrun momsawos se nesevin nir

⁹ Renge murrun ngok kele, numrreni nesevin nir paruri nijor ser nir renge sel nga mĩrres, sete parkowkowrir nga parlokloksi mete jinibb nir. Ko sete parlokloksi daron pilep nga parviri batur. Ko sete parlokloksi nevöt pilep nga parwuli gol, rreknga nevöt nen nga marok-lai lolo bottrum, rreknga sunsun nga nowlin mian mare p̄elak. ¹⁰ Ko parjoroĩ lweni nir sete tevi sunsun ko tevi majingen nga marres. Suri ngok evi murrun momsawos se nesevin san nga muwra ni evi kalesia nesevin san. ¹¹ Nesevin

parlik malum reнге Naim On, ko parloli norrormien ser pian ngatan nga parongrongwos. ¹² Nomok-wer ore nesevin nir nga sete parok-visviseni jinibb nir reнге Naim On, ko sete paran mare re norman, ko parlik malum kobbong. ¹³ Suri tuwi jer pa, Atua ololi Atam womujnen, ko vitunen ea-loli Iv. ¹⁴ Ko sete Atam ko nga murnge nale gerisen nen, ko vinnen ko ornge nale gerisen nen, ko otor otvi nale nesesreien se Atua. ¹⁵ Ko sel san otoi nga Atua pilai mauren tevi nesevin nir rengen, suri nesevin arvesi bipi. Ko nesevin parrul totoni kele ko wor nosurien ser ko merrenien ser ko paron pirres, sete parkowkorrir.

3

Murrun se jinibb nga marlelep se kalesia

¹ Nale ngel evi nale weretunen: 'Poro nga san emrreni pivi jinibb nga pilep se kalesia, ko ni emrreni majingen nga mirres pelak ngok.' ² Mernen sel sen pirres kemkañe ko wor, pimrreni temijpal nesen sen ko sete puoji nesevin minij;^A sete pivi jinibb nga pokminmin; pokmetmet lweni ni ko murrun puwokwok pirres. Ni pir ko wor nga pilai jinibb neturvitan paran jin. Ko ni purongwos piwerwer kele. ³ Jinibb ne minminen ko jinibb ne balpalen sete putori majingen ngok. Pivi jinibb nga nolon mumolmol, sete mokkarkar, ko sete norrormien sen puto pelak reнге nevöt. ⁴ Ko pivi kele jinibb nga purongwos pimmetmet metka sen nir ko puloli natun nir parosuri ni nga parunge drrelan. ⁵ Poro jinibb san sete purongwose sel nga pimmetmete metka sen nir rengen, ko pia-metmete kalesia nir pipse ko? ⁶ Ko jinibb nga mia-ivi taol

^A 3:2 Erpe iel, Pol owra 'Nesen sen pisanan kobbong', ko reнге nale se meri Gris nir, ngok erpe betile nale san nga mining nen erpe nga namlingi, 'pimrreni temijpal nesen sen ko sete puoji nesevin minij.'

kalesia bbong sete orongwos putori majingen ngok, suri nolon turow þelake, ko Atua tia-tor vitrangi tirpe pia-tor vitrangi Demij. ⁷ Ko jinibb nga putori majingen ngok kele pivi wor jinibb san nga jinibb ne vare nir parwerai pirlpel: ‘O, m̄erel evi m̄er nga m̄irres þelak.’ Ko re murrun ngok puloli nisen sete orongwos þisij, ko sete orongwos pivitan re nimet nga Demij m̄ilngi.

⁸ Ko re murrun ngok kele kobbong, jinibb nga marlai majingen nga marmajing se kalesia nir, parmomsawos þirres ko parvijuri nale nga marok-werai þirres, sete parok-mini þelak norro rreknga nuwi nga m̄iterter, ko sete parmerreni þelak nevõt. ⁹ Ko parosuri þiterter nale weretunen ngok renge murrun ne nosurien nga Atua miviseni pa musuw, nga sete nanu san pubbuþbuj renge norrorrmien ser suri. ¹⁰ Ko kalesia nir parrowrow lesi lartul nga marwera parlai majingen ngok nir puwomu, ko poro parviter, kalesia nir arongwos para-susture nir vajin. ¹¹ Ko nesen ser kele parmomsawos þirres, ko sete parwor-worsur, ko sete parok-minmin, parivi nesevin nga parok-majing tetajer suri norrorrmien ser þirres. ¹² Lartul ngok nir parmerreni temijpal nesen ser nir, ko sete paroþi nesevin m̄inij.^B Ko parivi jinibb nga parongwos parmetmete natur nir ko metka ser nir þirres. ¹³ Nir nga marmajing m̄irres renge majingen ngok, niser orongwos pian mare ko norrorrmien ser orongwos þiterter kele wor nga parrul totkoni murrun nga marosuri m̄irres Iesu Kristo.

Kerr kalesia rramtori totkoni weretunen se Atua

¹⁴ Timoti, daron nga moli naul ngel tevim, nomok-rrorrmii rreknga sete mia-periv nga bevinuk ðelesim iok.

^B 3:12 Erpe iel, Pol owra ‘Nesen ser pisanan kobbong’, ko renge nale se m̄eri Gris nir, ngok erpe ðetile nale san nga mining nen erpe nga namlingi, ‘parmerreni temijpal nesen ser ko sete puoþi nesevin m̄inij.’

¹⁵ Ko poro sete bevinuk pingavil, ko naul ngel evi nga puwrai visviseni murrun nga marsorsan nga rraptori, kerr nga rramivi kalesia se Atua nga mimaur. Kerr kalesia rramivi pa metka se Atua, ko rramtori totkoni weretunen oto erres.

¹⁶ Ko weretunen, nale nga miteptepi suri Kristo renge murrun ne nosurien se kerr ean mare elep. Arsuṣuṣe erpel: Kristo ngel, Atua ololi eplari ko evi jinibb erpe kerr nga rraprongwose ni. Ko Neñin On ewilwil sen nga muwra, ‘Ñernen le ngel.’ Ko anglo sen kele arlesi ni. Jinibb ne vare nir arunge nosṣen nga ñirres sen, ko jinibb ne iel ngatan nir arosuri ni. Ko Atua elai ni vajin ean elik tevi renge melrin.

4

Nevisvisenien gerisen

¹ Neñin On owrai tweni pa osuw nga daron nga iel ngatan putomori pusuw, jinibb sopor arongwos parlinglingi murrun ne nosurien ser renge Atua, ko parosuri neñin ne gerisen kobbong nir. Ko demij parongwos parkerkerasi nir rengen. ² Jinibb ne gerisen ngok nir nga markerkerasi jinibb nir mirpok, setemun arunge nanu san obbujbbuj re nolor daron nga marloli ñisij. ³ Nir parwer ore nga jinibb sete putotko, ko sete purro nanen lele. Ko Atua elngi pa nanen ngok nir nga jinibb nga marosuri ni ko marongwose weretunen parwera erres wor tevi Atua rengen ko parlai parurroi. ⁴ Nanu jijle nga Atua muloli arres kobbong; rramrongwos rrapurroi nanu jijle poro rraplot ko rrapwera ‘erres’ tevi Atua rengen. ⁵ Suri nale se Atua ko loten nga mirpok arongwos parloli nanu jijle paron ñirres re no Atua.

Jinibb ne majingen nga musorsan se Iesu Kristo

⁶ Poro nik Timoti kopok-werai tweni nale ngok tevi tasi kerr nir, nik kupivi jinibb ne majingen se Iesu Kristo nga musorsan m̄irres. Ko nale ne nosurien ko nevisvisenien nga m̄irres nga komok-vijuri pora-irpe nanen som rene kalesia mauren som. ⁷ Sete kuprunge tutunmasa gerisen nir nga marij tere nale se Atua. Ko kup̄elak ko wor p̄iterter tweni mauren nga musorsan m̄irres nga Atua mimrreni. ⁸ Rrek erres sapon nga marp̄elak tweni nga niber p̄iterter, ko erres kele rene sel jikle nga marp̄elak tweni mauren nga musorsan m̄irres nga Atua mimrreni. Suri jinibb nga muloli mirpok orongwos purnge p̄irres rene mauren nga lelingenok ko mauren nga pia-vini vitu kele. ⁹ Nale ngok evi nale weretunen nga kerr rraposuri torrtorrlai ko wor tetajer. ¹⁰ Ko rramlingi pa norrorrmien se kerr osuw rene Atua nga mimaur, nga mokla mauren tevi jinibb jikle nir, ko mare nen kele ela mauren tevi jinibb nga marosuri ni. Ko niko rramok-p̄elak milep rene majingen se kerr.

¹¹ Ko nik Timoti kuprij p̄iterter ko wor ko kupvisviseni nanu ngok nir tevi kalesia nir. ¹² Sete kuploli jinibb parkulu wutan rene nik suri nik kuvi m̄elakel kobbong san. Ko rene nale som ma ko liken som ko merrenien som ko nosurien som ko sel nga m̄irres som nga komok-loli tevi nesevin nir, puloli kupviseni sel nga m̄irres tevi kalesia nir nga parvijuri. ¹³ Pian pijpari daron nga inu bea-luwi e vini, nik kup̄elak nga kopok-eve wor Naul On, ko kopok-werwer, ko kopok-visviseni nir rene nale weretunen. ¹⁴ Sete kuploli norongwosien som nga Neṁin On m̄ilai tevim seveling nga pa puto nawon. Arlai tevim suri nale se Atua nga propet san muwrai tweni tevim, daron nga b̄irterawarrene nir nga marwowomue kalesia marwilwil nga marlingi nevrer rene batum. ¹⁵ Nik kuploli wor majingen ngok ko nir, norrorrmien som puto

ṽiterter renge nanu ngok nir, nga puloli jinibb parong-wos parlesi wose nga norrormien som oktajer malum. ¹⁶ Kupmetmete nik, ko kupmetmet renge nevisvisenien som kele. Kuptur ṽiterter renge nanu ngok nir, suri poro kuploli pīrpok, nik kupa-loli nik lweni kupasi van re mauren, ko nir nga marunge drrelam kele.

5

Murrun nga ṽirres nga ṽirij tevi jinibb nir

¹ Sete kupan kuprij ṽiterter tevi jinibb nga ṽitra, ko kuprij ma rijrijen lilane tevi ni, erpe ni evi tata som woswos kobbong. Ko kuprij tevi ṽelakel nir parirpe tasim woswos. ² Ko kuprij ṽirres tevi lekterwarreng nir pirpe nir arivi tasu som woswos. Ko kuprij kele tevi nesenwarreng ṽelakel nir pirpe nir arivi jojim woswos, renge sel nga muwokwok ṽirres.

Murrun nga parmetmete nesevin nir nga diwen ser marmij lingir

³ Kuposuri ṽirres nesevin san nga diwen sen mimij lingi ko nga metka sen san mijki nga pimmetmete ni. ⁴ Ko poro natun rreknga mebbun putoe, nir ngok ko parloli wos wore majingen nga milep ngel se kalesia nir, nga parmetmete metka ser. Nir parloli ko wor pīrpel, erpe parkele lweni ṽelaken se nir nga marvesir nga marloli tevir. Ngok evi nanu san nga Atua ṽir rengen.

⁵ Ko osorsan nga kalesia nir parmetmete nesevin nga diwen sen mimij lingi ngok ko nga metka sen arjiekie nga parmetmete ni, ko nga ṽilngi norrormien sen muto ṽiterter renge Atua, ko nga muklu tetajer nat ṽirin ko nat mupong nga Atua pokmetmete ni renge liken sen. ⁶ Ko poro nga ni mokrorrmi lweni ni kobbong, ngok erpe niben emaur malum ko neṽin emij pa osuw. ⁷ Nale ngok

kupwera tweni ko wor tevi nesevin ngok nir, nga parloli san sete orongwos ðiwer lokloksi nir rengen. ⁸ Ko jinibb nga mumusus pimetmete metka sen mirpe tasu sen san nga diwen sen mimij lingi, eviseni nga ni setemun orrul totkoni murrun ne nosurien, ko evan ngasu malum wore Atua easi jinibb san nga nosurien sen mijkie.

⁹ Ko renge naul ngok nga maruli tweni nise nesevin nir nga diwen ser marmij lingir rengen, nga kalesia nir parmetmete nir, kupuli bbong nise nesevin nir nga sia ser ñiasi ngavöl ouwon (60), ko nga marmerreri temijpal diwen ser mijpari daron nga marmij lingir, ko sete maroji norman ñinij.^C ¹⁰ Ko nir niser parres ko wor, suri nir arok-loli majingen nga marres. Nir parivi nesevin nga marres, suri artor pipi erres ejpari nga natur marlelep, ko arok-ir nga parok-la neturvitan parini jir, ko parmetmete kalesia san ðirres ðelak poro pivini jir, ko parlai se nir nga jinibb marojir. Suri nir norrorrmien ser eterter pa nga parloli majingen jijle nir nga marres.

¹¹ Ko sete kupuli tweni nise nesen ñelakel nir nga diwen ser mimij lingir. Suri daron nga norrorrmien ne totkoiën mivini ñiterter renger, ko taran ngasue Kristo vajin. ¹² Ko jinibb nir tarwer lokloksi nir vajin, suri arlinglingi tweni rijrijen ser nga womu, nga setemun partotko kele ko parkorti tevi Kristo ðisan vajin. ¹³ Ko pipok kele, tartipatun nga tarlik totrong nawon, ko tarivel karkar renge naim nir, ko tarunge lokloksi ko tarworworsur, ko tarsuþe nanu nga sete ñirres re nir parwerai. ¹⁴ Ko niko numrreri nesen ñelakel nir nga diwen ser marmij lingir partotko kele ko wor, ko natur partoe, ko parmetmet

^C 5:9 Erpe iel, Pol owra 'Diwen sen pisanan kobbong', ko renge nale se ñeri Gris nir, ngok erpe ðetile nale san nga mining nen erpe nga namlingi, 'pimrreri temijpal diwen sen ko sete puoji norman ñinij.'

lilane naim ser. Ko ngok puloli devje nuval se kerr sel ser pijki rrese nga parongwose parij tere kerr. ¹⁵ Nesevin nga diwen ser marmij lingir ngok sopor arivel lingi pa sel nga mimawos ko arvijuri Demij vajin.

¹⁶ Ko poro kalesia nesevin san evi sopespen e nesevin san nga diwen sen mimij lingi, ni ko pimetmete p̄irres sopespen ngok. Sete parloli belaken nen pian re kalesia jijle nir. Ko kalesia nir vajin para-metmete nesevin nir nga diwen ser marmij lingir ko metka ser san mijkie nga pimetmete nir.

Majingen se b̄irterawarrend nir nga marok-wowomue kalesia nir (elta)

¹⁷ B̄irterawarrend nir nga marok-wowomue kalesia nir, poro nga parmajing p̄irres, ko kalesia nir parosurir ko wor. Ko parlai kele nevöt tevir, ko ngok erpe arlai nowlir evaru ko. Parloli pipok pilep ko wor tevi nir nga marpelak milep nga marwerwer ko marvisviseni. ¹⁸ Suri Naul On owra ‘Daron nga kumlai buluk nga parbböt tututweni jelangi wit nir, kami kaploli ko wor parurroi jelangin ngok sopor, sete kapkai totkoni jingor.’ Ko nale owrai kele nga ‘Poro jinibb san puloli majingen san, erres nga ni pia-la nowlin ren ji jinibb nga mokmajing ser.’

¹⁹ Sete kaprunge nale san nga marwera ‘O, b̄irterawarrend ngok nga mokwowomue kalesia nir ololi esij’, poro sete nir p̄ieru rreknga p̄itul nga parwera pipok ewretun.

²⁰ Ko poro b̄irterawarrend ngok san puloli p̄isij, kuprij p̄iterter tevi renye no kalesia nir, nga puloli nir minij parmetutu kele.

²¹ Inu nuwrai eterter tevim renye no Atua ko renye no Iesu Kristo tevi anglo sen nir nga ni m̄ilngir pa musuw, nga kupvijuri ko wor nale suk ngok nga melai tevim.

Kuploli pusorsan ko wor tevi jinibb ðetðeti. Sete kuploli sel nga miterter tevi jinibb sapor, ko sel nga mimalum tevi nir sapon kele.

²² Sete nolom pingavilvil nga kuplingi nevrem renge jinibb san nga kupsusture ni nga putori majingen san se Atua. Ko sete kupkorti tevi jinibb karkar nir nga parloli kupvitan van renge nololien ser. Kuprrul totkoni mauren som puwokwok ðirres.

²³ Sete erres nga nik kopok-mini nuwi kis kobbong, ko suri nik komok-mesi daron elep, ko erres nga nik kopok-mini norro beblen nga puloli lilane depaim.

²⁴ Nololien se jinibb sapor arto limjer rres, ko jinibb jikle arlesi wos pae nololien ser osuw. Ko jinibb sapor ma arloli nololien ser arto kelti, nga jinibb sete ðilesi wose pian pijpari nabong nga Atua pia-wera suri lat nga puto suri tevi jinibb nir. Ko iok evi batun nga mowrai sete nolom pingavilvil nga kuplingi jinibb san putori majingen san se Atua. ²⁵ Ko erpok kele, majingen nga marres kele arto limjer kobbong. Ko poro sete parto limjer womu, ko nir para-pelari ko wor nabong sapon.

6

Murrun nga mumomsawos se jinibb ne majingen nir

¹ Nir nga marivi jinibb ne majingen parosuri ko wor numal ser nir ðirres, puloli sete jinibb san purongwose ðiwer lokloksi nise Atua ko nevisvisenien se kerr, nga parwera ‘O, kalesia nir sete armajing erres’. ² Ko jinibb ne majingen nga numal ser marivi kalesia sete arongwos parloli murrun ngok nga parwera “O, numal suk erpe tuwak kobbong”, ko sete parosuri ðirres suri. Ejki, par-majing ðirres kele wor, suri arok-majing se kalesia san nga marmerreri.

Nevisvisenien gerisen ko nijor nga marres

Nanu ngok nir, kupwer visviseni ko kupwer sesesre ko wor tevir. ³ Ko si nga mivisviseni nevisvisenien m̄inij nga sete musorsan tevi nale weretunen se Iesu Kristo Numal se kerr ko tevi nosurien nga mimawos m̄irres, ⁴ ko m̄ernen sete orongwose nanu san, ko norrorrmien sen ean mare p̄elak. Ko murrun ngok ololi arok-merreni lenglengen partertere nir re nale, ko nolor eleplep, ko parsisij tevir, ko parlat, ko norrorrmien nga marsij p̄elak parto tevir. ⁵ Ko ngok evi murru jinibb nga norrorrmien ser m̄ilengleng, ko weretunen ejki rres jir, ko niko marmerreri parlat tetajer. Ko nir arrorrmī nosurien se jinibb orongwos puloli sel nga putor sweri nev̄ot pilep.

⁶ Ko ewretun, murrun nosurien se kerr evi sel nga jinibb orongwos putor sweri nanu pilep, poro ni p̄ir suri sev nga muto pa jin. ⁷ Ko kurongwose, daron nga rrampelari iel ngatan sete rramtori nanu san tevi kerr. Ko daron nga rrapluwi kele, sete rrama-tori nanu san kele tevi kerr. ⁸ Ko poro nanen se kerr putoe, ko sunsun se kerr puto kele, ngok evter pa kerr ko. ⁹ Ko p̄isij re jinibb nga marokmerreni nga joror pilep, parirpe jinibb san nga nover misrapo ore. Ko murrun nga marmerreri joror pilep ngok e orongwos puloli parvitan p̄isij nga mauren ser pian p̄isij p̄etp̄eti. ¹⁰ Murrun nga marmerreri p̄elak nev̄ot e evi batbatu murrun lele nga marsij. Ko jinibb sopor arok-vijuri sel ngok eterter, ko aran ngasue murrun ne nosurien vajin, ko arloli nanu elep nga nir kele marunge m̄isij milep suri.

Nale mawos se Pol tevi Timoti

¹¹ Ko nik, Timoti, kuvi jinibb se Atua. Kupruj ngasue nanu ngok nir. Ko kup̄elak ko wor pilep nga kuploli murrun nga musorsan m̄irres, ko murrun nga muon

ñirres, ko nosurien, ko merrenien, ko nga kuptur ãiterter pijpari bongsin, ko nga kupivi jinibb malum. ¹² Kupwolu ãiterter renge woluen ne nosurien, nga kuplai mauren nga muto tuwi ngok vini pivi som. Suri Atua everuse nik nga kuplai mauren ngok renge daron nga kumwerai tweni nosurien som bonevis renge no delung nir. ¹³ Ko womu ne Atua, nga ñila mauren tevi nanu jijle, ko womu ne Iesu Kristo nga muwra tweni nosurien nga ñirres sen renge no Ponjes Paelet, ¹⁴ nuwrai eterter tevim nga kupvijuri nale nen nir ãiterter, sete kupvitan re nanu san, pianan pijpari nabong nga Iesu Kristo Numal se kerr pia-luwi kele vini rengen. ¹⁵ Kristo ngok, Atua pia-viseni ni renge daron momsawos sen. Atua ngok esan kobbong derteren sen otoa, ko jinibb jijle parsurövi ko wor, ko evi Numal se numal ngabe ngabe ãetãeti nir. ¹⁶ Ni esan rres kobbong nga mauren nga muto tuwi ngok vini oto jin. Ko lat nga ñilik ren erinrin erres, nga jinibb san sete orongwos pian mori. Atua ngok, sete jinibb san elesi wor nabong san, ko sete san orongwos ãilesi. Ko kerr rrapsusi nisen pian mare tetajer, ko rrapwerai tweni derteren sen nga puto pijpari tuwi ngok vini. Pirpok ko.

Kalesia nir nga nijor ser milep

¹⁷ Kuprij ãiterter ko wor tevi nir nga nijor ser milep iel ngatan, nga sete parloli norrorrmien ser pian mare ãelak, ko puto ãelak renge nevöt ser. Suri rrek nevöt orongwos pijijki kobbong. Ko nir parlingi norrorrmien ser puto renge Atua kobbong. Suri ni oklai pa nanu elep nga rraprunge ãirres rengen. ¹⁸ Nik kupwerai ko wor tevir nga nir parloli majingen nga marres, ko nga parir renge majingen ngok nir ãiasi nga marir renge nijor ser nir. Nolor parres, ko parvijngeni joror tevi nir nga joror mijkie. ¹⁹ Re murrun ngok erpe arok-lingi lilane joror

nga marres nir re melrin nga parto ðiterter tetajer tuwi ngok vini. Ko parongwose vajin parlai mauren nga mivi mauren weretunen.

Bongsi nale se Pol tevi Timoti

²⁰ O Timoti, kuptor totkoni ðirres nanu nga Atua ñilngi pa re nevrem musuw. Kupan ngasu re nale nawon ngok nga marij tere Atua rengen, ko lenglengen se nir nga marwera evi norongwosien, ko ejki, nir arkerkeris kobbong. ²¹ Suri jinibb elep arok-vijuri murrun ngok, nga muloli maran ngasu pa rengen murrun ne nosurien.

Ko ngel evi loten suk, nga merrenien se Atua pipitevi kami jikle. Nuwra “Remsom”.

Naul On Nga Mimerr Uripiv

The New Testament in the Uripiv language of Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 27 May 2022 from source files dated 31 Mar 2022

96303ce7-aa0a-513c-862d-415957a542e1